

**ԱՐԺ. Տ. ՆԱՐԵԿ ԱԽԱԳ ՔՅՆՅ. ՄԱՏԱՐԵԱՆԻ ԱՅՑԵԼՈՒԹԻՒՆ  
ԱՐԻՁՈՆԱՅԻ ՍՈՒՐԲ ԱԲԳԱՐ ՀԱՅՑ. ԵԿԵՂԵՑԻ**

Առաջնորդ Սրբազան Հոր տնօրինումով, Լա Վըրնի Հայց. Եկեղեցւոյ Հոգեւոր Հովիւ եւ Թեմիս Եկեղեցական Երաժշտութեան Ղեկավար՝ Տ. Նարեկ Աւագ Քինյ. Մատարեան Յունիս 26-27, 2010 երկօրեայ այցով մեկնեցաւ Արիզոնայի Սուրբ Աբգար Հայց. Եկեղեցի՝ հանդիպում ունենալու համար Եկեղեցւոյ Երգչախումբի անդամներուն եւ Սուրբ Սեղանին սպասարկող Սարկաւագներուն հետ:

Շաբաթ, Յունիս 26ի երեկոյեան երգչախումբի անդամները մտերմիկ զրոյց ունեցան Տ. Նարեկ Աւագ Քահանային հետ: Եկեղեցւոյ Ծխական Խորհուրդի Ատենապետ՝ Բրշ. Պերճ Սրկ. Մանուկեան բարի գալուստ մաղթեց Տէր Հոր: Տէր Նարեկ իր շնորհակալութիւնները յայտնեց Սրբազան Հոր, Տէր Զաքարիա Քահանային եւ Ծխական Խորհուրդին՝ ջերմ ընդունելութեան համար: Տէր Հայրը երգչախումբի անդամներուն բացատրեց Երգչախումբերու Միութեան ստեղծման նպատակը, որպէսզի երգչախումբերը ճիշտ եւ միատեսակ երգեն Սուրբ Պատարագը:

Կիրակի, Յունիս 27ի առաւօտեան ժամը 10:00ին Սուրբ Աբգար Հայց. Եկեղեցւոյ մէջ պատարագեց եւ քարոզեց Տ. Նարեկ Աւագ Քինյ. Մատարեան: Երգչախումբը ներդաշնակ եւ զմայլելի կերպով երգեց՝ ղեկավարութեամբ Պրն. Վարուժ Ակներեանի եւ երգեհոնահարութեամբ Սէրի Սաֆարեանի: Պատարագի աւարտին Հոգեհանգստեան Պաշտօն կատարուեցաւ Եկեղեցւոյ ծառայած հանգուցեալ պաշտօնեաներու հոգիներուն համար:

Սուրբ Պատարագէն յետոյ, Տէր Հայրը երգչախումբի անդամներուն եւ Սարկաւագներուն բացատրեց իր այցելութեան նպատակը, Եկեղեցիներէն ներս միանման երգեցողութեան կատարումը եւ Սուրբ Խորանէն Սարկաւագներուն ճիշտ երգեցողութիւնը: Ապա Սուրբ Պատարագէն հատուածներ ղեկավարեց՝ բացատրելով, թէ ի՞նչպէս պէտք է երգեն: Հանդիպման աւարտին իւրաքանչիւրին մէկական գիրք նուիրեց եւ Առաջնորդ Սրբազան Հոր օրհնութիւնները փոխանցեց անոնց: